

民國叢書

第五編

• 95 •



民國叢書

第五編

· 95 ·

綜合類

茹經堂文集 (三一六)

唐文治著

上海書店

唐文治著

茹經堂文集

第五編

本書據1945年版影印

余行年五十後專心講學惟以正人心救民命爲宗旨或曰君夙夜講貫於正人心一端或可收效矣若夫救民命一事現在滿目瘡痍野有鴻嗷屋無烏止豈無尺寸之柄者所能措手乎余曰不然人患不立志耳苟立志拯民於水火之中曉音瘖口以宣傳之著書立說以緣督之人性皆善必有聞吾言而興起者一人傳十十人傳百小以成小大以成大舉世之士皆以擔任救民爲事安在無同聲相應同氣相求者卽以吾妻一隅而論設立粥廠已閱七年同鄉諸君協力贊助賑濟鄉民自七百戶陸續達九百戶未始無小小之補苴也拙著文集初二三四編大都以正人心救民命爲當務之急已由及門金叔初張貢九朱貫微孫煜峯諸君子先後印行其原委具詳余所作四集跋中乙酉春正六日執友嘉定陳仲達先生偕舊時太屬中學同學吳君拯寰瞿君西華過從蓋余長中學時敦請陳先生爲教授兼訓育而吳瞿二君則中學中之翹楚也諄諄以印行文集五編爲言余以邇者紙工奇昂費尤艱鉅固辭之而吳瞿二君堅請且云有潘君仰堯鄒君鴻白可同任剗剛之資余不獲已將原稿授之憶余任太屬中學監督時每月由滬返婁一次必在禮堂聚集諸生講修養道德之方與國文進步之門徑諸同學靡不虛心聽講覃思研慮用是人才輩出在政界學界傳聲學說而卓然有以自立者指不勝屈余嘗謂教育之樂不必盡得天下之英才也卽吾郡屬之英才已項背相望矣宜聖之樂以忘憂非所敢望而亞聖成德達材之選彬彬然恂恂然豈非人間之至樂哉夫傳道之志願不在形迹而在精神惟望諸同學以余學說傳諸社會播諸寰區庶幾如孝經所謂天下和平災害不生禍亂不作是余旦夕所期望之者已乙酉莫春之月蔚芝唐文治

茹經堂文集五編目錄

卷一 雜著類

追記母病二則 甲申

壬午九月患膀胱證自述 壬午

論不忍 癸未

述徐楊二太翁行善事 癸未

論行善爲吾輩之天職 癸未

論行善當先人後己 癸未

論國家善氣惡氣關係廢興存亡 癸未

續勸善救民篇 癸未

勸惜字文 己卯

人生三不及論 乙酉

茹經堂文集五編卷一

太倉唐文治蔚芝著

雜著類

追記母病二則甲申

人生當世自懷抱以至成立惟父母是賴故詩曰無父何怙無母何恃竊謂蓼莪詩第三章父兮生我以下九我宇不營構魂攝魄凡人暇時三復蓼莪詩及孟子牛山之木兩章孝思常存卽良心不泯不孝侍親無狀然幼時之事常呈露於本心極嗚咽追記二則願天下人子皆及時以盡孝曾子有言父母既沒雖欲孝誰爲孝乎母追悔於無及也

不孝三歲時歲次丁卯吾母胡太夫人忽患小產時已懷妊六個月矣昏暈數次至於不省人事不孝略有知覺某夜三更昏暈極盛時不孝跪牀前伏牀沿邊吾母暈略醒見不孝甚駭強以手摩兒頂曰是兒耶不孝泣應曰然母曰速起睡余足旁不孝喜強起臥吾母病半月後始愈蓋其時吾父處館蘇州家貧甚臨產時僅雇一女傭已早睡矣至今追思之不禁流涕也

吾母素患肝鬱病發時頭暈甚至不省人事不孝十四歲戊寅春正月某夜母暈絕數四口不能言時質居南牌坊西趙家應下孝惶急無路狂奔至城隍廟天尚未明廟門已閉不孝卽趨詣神像前叩頭無數誓死以身代母叩禱數四天已明發瞥見泥塑皂隸猙獰狀大怖狂奔回家先姊啓門曰弟焉往吾不見弟

厥欲死矣不孝急問母暈何如姊曰幸頃已稍蘇弟可勿再禱求不孝急詣房中呼母呻吟而應越十數年遷至大橋南王大吉藥肆房屋吾母心境稍舒又請浙醫沈雲程先生診視用白鳳丸療治肝疾始痊憶執友曹君叔彥有詩曰回思中夜祈天日猶是吾生最幸時蓋言吾親尚在也今吾親棄養久矣嗚呼痛哉

壬午九月患膀胱證自述（附陳邦典醫師治療方法）壬午

余所患爲老年性攝護腺肥大症已有數年之久初時每夜小便一二次以後與時俱進逐漸增加最後日間小便亦尿量不多而次數迭增原其所以如此因小便後尚有剩餘尿留在膀胱故也至壬午年九月甚且有一二日小便不通僅溢流少許並不自覺余病勢既見嚴重由及門表姪醫生朱君增宗紹介同鄉嘉定陳邦典先生來診察陳泌尿專科家也乃於壬午舊歷十月初三日進體仁醫院當用導尿管從尿道通入膀胱先放儲尿三百西西此後每一小時續放一百西西至二十餘小時放盡儲尿既經積累時日放尿亦不宜速在頃刻除在導尿時期所進飲料之尿量酌除不計外當時儲尿竟有二千西西左右之多此數較常人尿量多出五六倍則知膀胱之脹大有如此其痛苦可想見矣然由來已久亦非一朝一夕所致也自此以後余在醫院中仍藉導尿管排尿並常洗滌膀胱每星期換管一二次一面注射舉丸內分泌製劑作排尿試驗數次同時曾試用中國秘製丸藥但均歸無效於是準備攝護腺摘除手術以期根治先作身體總檢查無如化驗尿汁與血液有發炎及尿毒初起現象照膀胱鏡知膀胱與攝護腺腫脹殊甚試驗腎臟又係排洩工作失常他若肺部更患慢性氣管炎恐開刀後咳嗽頻作足使創口傷痛益以余年近八旬精力較遜有此種種原因與其輕試根治手術反多冒險不如退一步想先施假道手術較爲安全所謂兩

害相權取其輕之意也因商請曹農濤醫師會診意見相同並徵得余家屬同意遂於舊歷十月十八日上午用局部麻醉施行膀胱開口手術爰從小腹到膀胱開一孔並用橡皮管通入膀胱以爲小便臨時出路朱君亦參加襄助歷半小時經過良好余回病房後尿由橡皮管中源源流出其流出之一端懸以一瓶爲貯尿之用後來起身行走改用橡皮製貯水袋可繫諸股脛之間尙無不便至十一月初四日由體仁醫院用病車送余平安出醫院按鄙人行年八十自經曩年陳醫師治療重證後起居飲食動靜自如而現在出外講學酬應均與從前無異近體尤極舒適感不去懷爰就在醫院時臨診所得敘述如次並附錄陳醫師治療方法俾世之同病者知所問津焉

老年性攝護腺肥大症治療須知

一 凡年在五十歲以上之男子夜間小便一二次或較多時即須請專家醫師詳細診察如此症初起可注射鞣丸內分泌製劑即能見效否則心臟腎臟以及血壓等後來亦有漸受影響之可慮

二 如至割治程度醫師認爲須用手術時倘病者身體健全宜從早施行萬不可蹉跎玩忽坐待小便突然閉塞發生嚴重情勢

三 若不從速醫治即有生命之虞其醫治方法先用導尿法放清儲尿再作身體總檢查以定手術之施行

四 倘檢查結果病者心臟腎臟或其他部份均有不健全現象認爲開刀指摘除病不合格祇可仍用導尿法勿使儲水或用膀胱開口術俾小便得有臨時出路一面將息調理俟受病各部份健全時

始可爲攝護腺摘除手術但須聽醫師決定務以安全爲目的

五 在此科學昌明時代醫學亦力求進步外國最近發明一種電摘鏡可從尿道摘出攝護腺不必用

開刀手術將來滬地各大醫院有此種設備時改用電鏡摘除手術較爲安全

論不忍癸未

乾坤之所以不息者生人不忍之心維繫之也何言之易傳天地之大德曰生又曰生生之謂易生生者不忍之根源也不忍之心滅乾坤或幾乎息矣孟子曰人皆有不忍人之心人字重讀苟無不忍之心非人也又曰今人乍見孺子將入於井皆有怵惕惻隱之心睢州湯潛庵先生

諱城隱文正

謂學者以此二語常存於心

即可上達天德此言何謂哉蓋怵惕惻隱之心良知也良知不忍之所發也孟子見梁襄王問天下惡乎定對曰定於一孰能一之對曰不嗜殺人者能一之不嗜殺人非不殺人不嗜者不忍也齊宣不忍殺一牛孟子許之以王曰臣固知王之不忍也又曰君子之於禽獸也見其生不忍見其死聞其聲不忍食其肉宋蘇子瞻引伸其義曰殺人者譬如屠殺牛羊剗割魚鼈以爲饕餮食者甚美見食者甚苦使見其號呼於刀俎之間宛轉於挺刃之下雖八珍之美亦將投筯而不忍食矣仁哉斯言物猶如此人何以堪今茲蒿目縱觀野有餓殍白骨纍纍號呼慘怛者不可勝數目不忍睹耳不忍聞嗚呼吾之所見所聞者如此其不得見不得聞者不知幾千萬也苟不拯諸水火之中而俾之得所於心其何忍乎而人且曰天演之理如是也嗚呼此忍心害理之說也或又曰吾欲救之而力有未逮也嗚呼力不足者獨不可騰於口說傳於文字乎二人播之口說傳之文字什百人應而和之則有力救人者出矣余向作慈幼保種篇以爲一家之人種家

落則一鄉一邑之人種寥落而一國之人種可危矣有限者生命無盡者干戈草薶禽獮人民其何罪乎按諸字義忍字從刃從心形聲而兼會意人苟以刃加於心有不好殺人者乎有不轉刃以自殺而並殺其子孫者乎曾子曰出乎爾者反乎爾者也孟子曰殺人之父人亦殺其父殺人之兄人亦殺其兄未有不報者雖悔其何及矣吾悲夫輾轉流離號呼慘怛者之日衆也吾悲夫吾國人種將零落而衰替也吾悲夫加刃於其心轉刃以自殺而殺其子孫也於是乎論不忍

述徐楊二太翁行善事癸未

崑山徐太翁佚其名性落拓人咸以爲狂清初親王某邸下江南其部曲沿途略婦女約三千人某邸與太翁爲舊相識聞其在鄉間有大樓十餘楹與謀安頓並與給養費太翁欣然曰諸吾當爲分部以居之嚴防走失某邸喜甚遂遷入越數日太翁度其去遠大購牛羊豕骨人以其落拓也不之詢又越數日僦大舟十餘艘密詢遠省婦女曰汝等欲歸乎則大喜應曰求速歸遂於夜靜時遣婦女登舟擇平日之司事誠實者集河干告之曰吾以此十數艘婦女請君等護送各回本籍倘中途有鬻賣或曖昧事上有神明果報不爽親顧首以誓並謝諸君遂稽顙有聲司事皆感動曰敢不惟命舟中婦女聞之皆泣下泊舟回又分遣略近與最近者數次遣畢某夜忽樓中火起煙燄迷漫不可鄉邇人不及救昧爽則見焦骨累疊咸曰太翁已焚死矣越歲餘某邸回有告知其事者某邸親往視察洒淚曰人多易於失慎吾累吾友矣遂去又越數年太翁忽同人詢之則微笑曰吾幸脫於火難耳是歲適值鄉試吳俗鏡聽占中否太翁有三子長曰乾學號健庵聞太翁語曰一門三鼎甲以太翁之偶語也未之信復行數十步遇一醉人忽語之曰汝父言不錯已而果

然乾學顯貴至宰相人咸羨其功名之赫奕也而不知太翁積善所致也

余居京師時設帳常熟翁文恭公宅中甲午得見無錫楊藝芳太翁謙恭而和望而知爲仁人長者已而聞其在李文忠公鴻章幕中積善甚夥李公平粵匪克崑山而蘇州而無錫而常州而鎮江每克一處太翁必於四城門外距城約三四里分設粥廠十餘處饑民雲集流徙他處者亦皆來歸惠澤所被沾溉及於子孫庇蔭無極方今鴻嗷遍野啼飢號寒之衆所在皆是幾於目不忍睹耳不忍聞救濟之法惟有多設粥廠但米價昂貴不易得當間以雜糧有如大菜館大飯店大旅館每日宜將餽餘之食攪和成粥於晚間惠施飢民全活亦當不少居今之時惟有忱惕惻隱孳孳爲善庶可留後福於將來此等善機善緣萬不可失深望諸仁人君子盡力拯救勿錯過機會也

論行善爲吾輩之天職癸未

孟子言禹思天下有溺者由己溺之也稷思天下有飢者由己飢之也禹爲司空稷爲農官豈其責任固當如是乎古之聖人一夫不得其所曰時予之辜作時通即非吾之責任者亦當引爲天職孔子所謂當仁不讓是也堯之治天下也曰一民飢吾飢之一民寒吾寒之一民有罪吾陷之堯舜之世所稱大同之治也其有能實行之者乎癸未之冬歲禾不登百貨轉運維艱常斯時也寒威栗烈無衣無褐者踵相接飢寒顛踣以死者不知凡幾將來野有餓殍白骨如山痛乎哉吾國民也余擬補孟子之文曰思天下有寒者由己寒之也而輾轉流離號呼無告者尤當亟爲之拯救也詩云哿矣富人哀此鰥獨非嘉美富人言富人皆當哀此鰥獨者也此天職也孟子曰周於利者凶年不能殺周於德者邪世不能亂夫周於利者何爲乎非欲推其

利以救吾民乎苟專利而不知救民其利庸可保乎顧亭林先生曰天下存亡匹夫有責非先以救民爲先務之急乎非吾輩之天職乎

論行善當先人而後己癸未

聖人先人而後己賢者推己以及人愚不肖有己而無人何言之禮記坊記篇子言之善則稱人過則稱己則民不爭善則稱人而怨益亡此先人後己之說也論語孔子告子貢曰己所不欲勿施於人他日又告之曰己欲立而立人己欲達而達人能近取譬可謂仁之方譬者以己譬人己也譬如我欲處於富貴而處人於貧賤我必處於安樂而處人於困苦天下有是理乎如是則人心交怨而不平不平則相爭甚至相奪相殺而天下亂一家如是一國亦如是世界之所以擾攘而不安者皆人己之間隔爲之也是以大舜有大焉舍己從人先人而後己也老吾老及人之老幼吾幼及人之幼推恩保四海推己以及人也傲很明德惟己獨尊貪黷無厭剝民脂膏詆訑之聲音顏色距人於千里之外祇有己之見絕無人之見國民性質漸染淪胥而乾坤幾乎息矣夫仁者人相耦也从人从二其一爲我其二則對於我者不知幾千萬人也以一人之血氣心知而欲與千萬人之血氣心知相角逐庸可勝乎且己心勝則轉而爲忌忌从己蛇也安有蛇蟠於心而不螫人且自螫以死者乎吾悲夫人己之見紛紜交鬭而世界阨隘而不安也特大聲疾呼曰今日行善當先去人己之見

論國家善氣惡氣關係廢興存亡癸未

宋程子白士君子處治世則德行日進處亂世則德行日退何也一則善氣滋一則惡氣漬也斯言於古有

微乎曰有之曾子言與善人居莖乎如入芝蘭之室久而不聞則與之化矣與惡人居貨乎與惡也如入鮑魚之肆久而不聞則與之化矣善氣惡氣之沈浸旁薄在無形之中與之俱化可懼哉孟子曰君子之澤五世而斬小人之澤五世而斬澤者氣之鬱蒸而成者也孟子蓋隱據周易世卦之義亦有未至五世而先斬者矣易傳積善之家必餘慶善氣積則發而爲慶積不善之家必餘殃惡氣積則釀而爲殃豈造物省記於其間哉故又曰善不積不足以成名惡不積不足以滅身君子居其室出其言善則千里之外應之應之者善氣相感召也居其室出其言不善則千里之外違之違之者惡氣勝則善氣消也今試驗諸念慮之微一念正直則善氣應之一念邪曲則惡氣隨之古語所謂惡迪吉從逆凶惟影響是也又試驗諸言語事爲氣善則言語善事爲善清明在躬志氣如神矣氣惡則言語惡事爲惡卑鄙醜齷貪黷剝無所不至矣又試驗諸一家一鄉一邑德鄰仁里皆善氣之感通也保抱攜持以哀籲天哀我墳墓宜岸宜獄皆惡氣之腥聞也又試驗諸上古蚩尤作亂鴟義奸宄泯泯焚焚蒸而爲霧瘴厲夭札於是興焉惡氣之盛也中天之世庶雲糾縷南風之薰可解民憂善氣盛也洪範肅乂哲謀聖善氣也狂僭豫急蒙惡氣也天人相與之際可畏之至也下迨夏商周而後興滅終始無非善惡之氣迭爲消長縱橫億萬里上下數千年國家將興必有禎祥國家將亡必有妖孽善必先知之不善亦必先知之至誠如神者驗其氣也先儒有言子弟讀詩書之氣則莫不聰明子弟吸金銀之氣則莫不愚蠢飲其氣而然也禮孔子閒居篇曰志氣塞乎天地正明目而視之不可得而見也傾耳而聽之不可得而聞也其論至爲精密孟子又申言之曰志氣之帥也志至焉氣次焉宋文文山作正氣歌曰是氣所磅礴凜烈萬古存三綱實繫命道義爲之根此卽浩然之氣也吾輩欲

養正氣爲善而已矣

余前作釋氣篇頗極紛紜瑣瑣之觀此篇宗旨在勸人爲善世界多善氣則國性皆善矣是太平之基也與釋氣篇用意略異茲經自記

續勸善救民篇癸未

前作勸善救民篇踰一年國難未已滿目瘡痍痛甚於昔勸善子曰嗚呼孟子言雞鳴而起孳孳爲善者舜之徒又言樂善不倦今日一大戰國也救之之道彊爲善而已矣古之聖人視民如傷而積善長久者莫若周文王文王發政施仁必先鰥寡孤獨蓋此四者窮民無告救之不容須臾緩也詩云嘏矣富人哀此鰥獨竊願富人皆哀鰥獨則其積善於子孫者固無涯涘其有益於國家亦非淺鮮也

孟子言西伯善養老治其田里教之樹畜導民妻子使養其老所以廣天下之大孝也今宜勸善人君子多設安老院蓋老而無依者往往鰥而兼獨或窮困不能行動或殘廢疾病無人扶持鬱急而死者衆矣有安老院則可得所其識字者多置書籍報紙俾資解悶其身體較健者略爲工作俾資生活之助至其居處務使空氣流通不可淤陰男女亦宜分處此爲老人馨香以祝之者也

其二曰廣設慈幼院余前作慈幼保種篇已詳言之今日之難童流離於道路者慘不忍言矣問其姓不知也問其名不明也覓其形狀飢餓而垂斃也聆其言語哀痛而迫切也曰吾父母棄我之時號哭不能止也吾牽衣追之父母尙揮涕而躊躇也嗚呼此難童也人種之攸關也非余救之而誰也然則慈幼院不可不急設也其法分嬰孩幼稚爲一區乳哺照拂務使慈惠精細者司之分五歲以上者爲一區保姆管領之可

教以識字讀書矣分十歲以上者爲一區師傅管領之教以讀書可漸就職業矣而其尤要者凡四五歲以上兒童能記其父母姓名及本鄉住址者除記錄入冊外每名宜於胸前各掛一小牌寫明父母姓名及地址令其不忘父母親念書曰如保赤子孔子曰少者懷之其爲積德也大矣

其三曰廣設敬節院聞故老相傳曾文正筭兩江總督逝世後清節堂節婦均臨喪痛哭或問之則曰大帥每月必蒞堂數次稽查誥誡男司事毋得有戲謔傲慢之容女司事毋得有怠惰偏強之習闔堂感戴大德今已矣于此可見先輩辦事之愼勤今擬易清節堂爲敬節院易曰苦節貞凶又曰甘節吉能安苦如甘自當敬之而弗渝蓋禮義廉恥之大防首在於是矣

以上曰安老院曰慈幼院曰敬節院如力能兼設固盡善矣不能則獨設一院亦可規模較小者則稱爲會鄙人前設有敬節會深愧力量棉薄然藉此以資生活者亦得苦度難關前數年鄙人有言能以拾圓救一命是大便宜事現在能以數十元或百元救一命亦可謂大便宜矣時艱日亟爲善機會萬不可失同志之士其勉之哉其勉之哉

勸惜字文己卯

凡不愛惜五穀者其人必窮不愛惜字紙者其人必賤感應之理然也憶文治年十一歲時拋棄一火柴匣先母怒之文治對曰此不過洋文耳先母大怒曰洋文非文字乎汝不讀洋文遂輕棄洋文乎汝惟不愛惜文字所以讀經書不能純熟汝亦知中西文之一體貴重乎文治聞之悚然銘心刻骨迨年長始知中國文字與西國文字同爲文化大樞紐而文化之盛衰卽爲國家存亡之大樞紐先母之訓世世子孫當永守者

也同鄉某戚用報紙包遺矢擲諸院外人勸之則曰西法不貴字紙後得絞腸痛病號呼宛轉數十日而死嗚呼吾嘗遊歐美各國從未見有字紙飛揚道路國人皆尊重其本國文字至廁中異常潔淨草紙各齊備輪舟火車中均如此何嘗有用報紙擦遺矢之事今乃糟蹋字紙自號文明酷受慘報可笑尤可痛恨也人生天地間無論士農工商輩無日不食穀無日不寫字乃昏昧自忘本根此浩劫所由起再不醒悟劫運何所底止乎今宜定辦法學校中設立惜字會磚砌焚化字紙所簡單者用鏟除焚化本校字紙外並飭校工於暇時檢拾街上字紙負竹筐用竹鉗見有字紙即收入筐內歸後細檢有汙穢者用清水漂淨晒乾一律焚化將字紙灰包固拋入大川一面由同志捐款多購字簍簍上黏貼勸惜字文酌送各戶輾轉勸導最宜注意者報紙狼藉切勿糟蹋蓋珍重字紙先宜珍重報紙充珍重報紙之心以珍重書籍庶幾文化日隆國運其復興乎友人崇明王丹揆先生文集中有惜字小引余特師其意爲勸惜字文大雅君子勿迂視之幸甚

人生三不及論乙酉

人生世界間有三不及慎毋追悔於將來一曰孝有不及凡人百年之中有疾病焉有老幼焉君子思其不可復者而先施焉父母既歿雖欲孝誰爲孝乎年既耆艾雖欲弟誰爲弟乎故孝有不及弟有不時其此之謂乎以上大戴禮記能無痛乎讀孝經紀孝行章之五致惟居則致敬養則致樂爲人子承歡膝下之時乃未幾而病則致憂矣未幾而喪則致哀祭則致嚴矣夫往而不反者年也逝而不可追者親也此管子語小

草庇蔭下春暉庸能久駐乎其可痛何如乎宋歐陽子曰祭而豐不如養之薄也爲人子者可不及時以盡

孝乎二曰學有不及論語言學如不及猶恐失之縱覽後世學者失之者多而得之者千百人中不過得一二非其以玩時而惕日乎後生可畏不轉瞬至於四五十而無聞則虛生於世矣老冉冉其將至痛修名之不立大易之朝乾夕惕卜子之日知其所亡月無忘其所能其可不隨時提撕以警覺吾心乎晉陶侃云大禹惜寸陰吾輩當惜分陰學者可不以此語書紳而銘座乎流光之迅速若駒之過隙詎可不珍惜乎三曰爲善有不及論語言見善如不及又言善人吾不得而見果何謂乎豈不以善幾稍縱而卽逝乎凡人發生善念如電光石火而善因亦如電光石火吾妻某君偶行於路見道旁幼童蹣跚踴躍詢之則謂太倉人也此童將涕泣陳詞矣而某君適以他事舍去迨明日求之則渺不可復見矣某君至今引以爲歎嗚呼此幼童豈已填溝壑中乎其可痛惜何如乎余嘗作放賑急救法刊入勸善編中言救人如救火蓋天下事未有急於救人命者也余因憶甲子年施賑衣發護照較遲延鹿河凍斃老嫗一新豐凍斃小孩一至今引爲大恨痛乎施粥施衣其可遷延不決濡滯不前乎古人言善念之起鬼神鑒之吾謂不啻鬼神促之善緣一去殃禍有不隨之者乎吾是以紀之以自勉以勉子孫且以勉同志之倫大聲而疾呼曰人生有三不及愼毋追悔於將來

茹經堂文集五編目錄

卷二 雜著類

論孝道之要戊寅

論妖孽戊寅

儉德非食約戊寅

天問獸言感辭戊寅

香港孔道學院演講錄戊寅

辭賀重宴鹿鳴文壬午

孫君煜峯五子字說甲申

香草居題詞甲申

任琪女士懸壺紀念訓辭乙酉

孝純孫女大學畢業訓辭乙酉

胡君春臺收藏先哲書畫題辭乙酉

茹經堂文集五編

卷二 目錄

茹經堂文集五編卷二

雜著類

太倉唐文治蔚芝著

論孝道之要戊寅

凡孝之道先在自愛其身孝經所謂身體髮膚不敢毀傷是也惟不毀傷其身體尤須不毀傷其心性神明孟子言世俗之不孝有惰其四肢五者皆毀傷身體之事也禮記祭義篇曾子言士人之非孝有五居處不莊五者皆毀傷心性之事也孟子曰不失其身而能事其親者吾聞之矣失其身而能事其親者吾未之聞也何以能不失其身自愛其身而已矣是故不登高不臨深自愛也不服闋言不爲暗味之行不登危言不爲危自愛也居上不驕爲下不亂在醜不爭皆自愛也不取非分之財不蹈非法之行兢兢焉業業焉則禍患不及其身矣

進而上之勉爲君子勿爲小人子曰君子喻於義小人喻於利義利者君子小人之分途實人心生死之界也人而墮落爲小人不孝莫大焉大學曰不仁者以身發財吾國民以發財爲口頭語趨利若鶩於是禮義廉恥掃地無餘常以非分之財供奉其親嗚呼以清白之軀而貪污如是此白華之詩孝子所以貴潔養也風俗惡劣一蹶不振伊誰之責哉

又進而上之則爲尊親孟子曰孝子之至莫大乎尊親尊親之至莫大乎以天下養或疑恐開僭竊之漸其

實非也禮記孔子對魯哀公曰仁人事天如事親事親如事天雖畎畝之中儼然有嚴父配天之氣象尊之至者在心而不在迹也更有進者孔子孟子之尊親後人爲立崇聖祠於聖廟之後所以昭尊親之典至隆也乃近聞各縣崇聖祠多有利用其地而拆毀之者嗚呼人孰無親度先聖先賢在天之靈必覺然而不安余嘗作崇聖祠急宜恢復議實於振興人心風俗非細故也

又進而上之則大孝通於神明矣孝經曰昔者明王事父孝故事天明事母孝故事地祭天地明祭神明彰矣覺其言之廣大而無涯既而思之事父之與事天事母之與事地其分雖殊而其利則一擴而充之而已虞舜大孝人也孟子贊之曰明於庶物察於人倫所謂神明彰也而其精意則曲禮所謂視於無形聽於無聲爲人子者能於無形無聲之中常體察父母之志意順而行之其心日益精細對於萬事萬物自能因應中節所謂致中和也故曰君子之道造端乎夫婦及其致也祭乎天地豈高遠哉神而明之存乎其人

又進而徵之於諸經考其勸孝之方周易心學之書也易感孝思觀於乾坤生六子卦又生十二辟卦又生六十四卦生生之謂易孝思油然而生矣尙書首篇美虞舜克諧以孝周公作詩曰永世克孝召公作詩曰有孝有德成康之世詩人頌揚曰孝子不匱永錫爾類又曰永言孝思孝思維則魯頌詩亦曰靡有不孝自求伊祜至於變風變雅若陟岵若揚羽若蓼莪悱惻離憂可歌可泣矣士禮十七篇無非歸本於孝曾子讀喪禮泣下霑襟其感人如此大戴禮記言孝詳於曾子大孝立孝而尤精於疾病篇小戴禮記言孝節目詳於曲禮內則文王世子諸篇而尤精於內則篇曾子之言至參考書以明代黃石齋先生孝經集傳挾經之心爲千古不刊之作宜頒諸學校俾生徒熟誦而服膺之也

論妖孽戊寅

中庸曰國家將亡必有妖孽禍福將至善必先知之不善必先知之妖孽者何或曰如龍螯之產褒氏是也吾謂不然殷高宗彤日越有雉鳴鳳鳴朝陽而成康以興鸞集朝堂而隋煬以亡於此爲瑞於彼爲孽此難知者也左氏傳曰妖由人興也人棄常則有妖孽常者悖仁義禮智信五常之德反父子君臣夫婦兄弟朋友之倫賊性理溺奇褻侮慢聖賢荒道敗德是謂之妖此易知者也其說之來也無端其萬口附和也無迹如醉如狂如噎如游魂如落魄如墮雲霧如憑鬼物於傳如神降於莘如言出於石維恍維惚莫可紀極無以名之名之曰孽此難知者也孟子論一治一亂曰暴君代作國圉汙池沛澤多而禽獸至此獸妖也及紂之身天下又大亂此人妖也春秋時臣弑君子弑父人妖也戰國時楊朱墨翟之言充塞仁義率獸食人人將相食獸妖與人妖合焉者也有形或無形者也變天之道絕地之理概以爲不足信於是九宇山川魑魅罔兩之物皆出而爲妖孽是心術之妖無形者也言語譎詭衣服冶淫機事譸張飲鳩毒酣舞場角雉戲形形色色怪怪奇奇是事爲之孽有形者也孔子曰素隱行怪後世有述吾弗爲之天下之妖靡不根莖於行怪是學說之妖無形者也孝經曰五刑之屬三千而罪莫大於不孝要君者無上非聖人者無法非孝者無親此大亂之道惟有無上無法無親之學說而後有要君非聖非孝之事實此有形而根於無形者也有形者易辨無形者難知也天之意若曰元惡大憝矧惟不孝不友是妖孽也其速由周文王刑茲無赦夷狄之汨陳猛獸之搏噬是妖孽也其速由周公兼之驅之通周書所載春秋戰國利慾障塞百川橫流其速由孔子孟子平天下之妖除天下之孽凡一代之混亂必生一代之聖賢堅苦卓絕旋乾轉坤以正人心以息

邪說以誅生民霹靂震空而蚩霧滅泥曜靈經天而寰宇麗明大道之行三代之英盜竊不作災害不生立斯立道斯行過者化存者神其在斯乎其在斯乎

儉德菲食約戊寅

易否卦大象傳曰君子以儉德辟難宋楊誠齋先生易傳曰惟能忍天下不可忍之窮乃能避天下不可避之難旨哉得素思難之道矣禹平洪水之難極人世不堪之苦然後中國可得而食其功德東漸西被暨朔南聲教訖四海孔子贊其無間之德首曰非飲食余嘗推言之曰能忍天下不能忍之苦斯能平天下不能平之難易頤卦自求口實言能自養也由是而養賢以養萬民大象傳曰君子以節飲食自古貪口腹之累者未有不爲心害者也今爲避難計爲救民計爲興國計請採用吾言

文治幼時聞崑山朱柏廬先生款客不過錢七十文厥後略有知識隨侍先大夫款客不過制錢二千文較朱先生時幾加二十倍餘矣以近時之款客較先大夫時不幾加至五六十倍乎奢侈愈甚世界愈窮余初官京師時款客不過銀四五兩迄今日而飲食若流流連荒亡無所底止嗚呼此非危亡之先兆乎

憶光緒丙戌丁亥間江西水災告急吾妻設捐振處時先大夫館城北陸氏館主名錦采學徒智賢智海等值歲莫放假肅束宴師先大夫謂智賢等曰汝輩可攜席費四金隨我往捐振取收據交汝翁吾固願飲酒明日祇須素菜四盤費不得過一金翼日文治隨往館主奉命惟謹飲盡歡而散自粵匪難平後太邑漸由儉入奢先大夫恆慨然曰老人洗腆宜流餘慶小兒初生當貽哲命世俗一是鋪張揚厲是轉爲老人小兒造孽也盡分餘貲以周貧乏乎至於嫁娶品節禮有常經今糜費無限是致貧之道風俗之大憂也當是時

先師瑞安黃漱蘭先生督學江蘇素豪飲伏臘休憩每次飲酒以十五斤爲度僅食榛子或杏仁數枚供張滿漢酒席概設屏弗御曰眞飲酒者當如是今人自命善飲而不免饕餮非特有妨衛生亦豈雄豪之量哉謹述先大夫仁儉之訓與先師眞酒量如此

凡生於天地之間者皆曰命人愛其命萬物亦各愛其命孟子曰仁民愛物君子之於禽獸見其生不忍見其死宋蘇子瞻代張方平諫用兵書曰譬諸宰割牛羊魚鼈以爲膳羞食者甚美被食者甚苦使見其號呼於刀俎之間宛轉於挺刃之下雖八珍之美亦將投箸而不忍食此眞仁人之言也際茲國難爲古今中外數千年來未有之慘禍今日吾國民之性命亦猶之牛羊也猶之魚鼈也他日吾輩之性命亦猶之牛羊也猶之魚鼈也一念及此怵惕惻隱之不暇尙忍大嚼乎今雖不能效釋氏之戒殺亦當體天地生生之心節物力以全物命爰與同志約此後宴會菜肴當葷素相間每席七八人以八簋爲率至多不得踰十簋違者罰款救濟難民

天問獸言感辭皮寅

古之人有託於禽言者鷓鴣之詩是也綢繆關戶或敢侮予聖人歎爲知道治國家者當永爲鑑而獸言蓋闕何哉昔者齊宣王大起苑囿廣袤方四十里芻蕘茂焉雉兔萃焉麒麟虎豹狙公狐狸之屬雜遝乎其中習伯嚭公冶葛盧之技者聞有山經未載之奇文咸往聽焉恍聞虎豹言曰險巖世心惟很莫敢爭吾之術專尙很日噬人爲事舉世所謂不忍之心掃除而漸滅之有畏我者則變我轉爲犬羊羶庶幾人不我覺食人盡其族而人莫知我惡狙公言曰摩邊日月蔽遮乾坤惟戲爲能吾朝三暮四朝四暮三以簣鼓是非博

雅之士探原窮始方以吾爲人類之首基吾鼻祖也誰不趨承崇拜我哉狐狸言曰吾同煬鼉焉用天禱吾之計始以媚終以蠱有不信我者多方以媚之自入我彀中幽草盡率篝火夜鳴變幻離奇靡測面目之真麒麟怒之曰咄嗟汝虎豹自恃其很益紛人之爭人各有機心實汝于陷阱汝僅能食同類且自食其子孫在昔商辛無道纘汝周公驅汝萬里外投有北有北不受尙安敢入朝市而橫吞俾庶耶汝狙公卑身而伏以候教者東西跳梁中于機辟秦漢之交有沐汝而冠者坑卒腥聞名雕不逝徒喚奈何玩世股掌反而報汝知之乎汝狐狸居上世食委壑尸唐高宗時幾傾國祚由汝掩袖工讒焚惑主聽汝心較虎豹狙公爲毒厥罪實盈吾不屑與汝輩伍是以游于西狩之圃經纂成人獸肇分古禮有言國有鳥獸行則獮之今濟爲一人而獸獸而人仁義充塞率獸食人造化雖有愛物之仁而不能容汝于覆載之內草薶禽獮之禍靡有底誰作俑乎俄而雷霆震驚宙合清明來告者曰有大賢孟子至國境矣人獸幾希察於人倫矣違獸不遠者發見其良心矣于是虎豹竄于林狙公喪其魂狐狸匿其形麟乃吐玉書煥乎炳乎紛乎綸乎以組世界之文明識者曰此卽記所載猩猩能言屈子所問何獸能言之徵也治國家者當知道不遠人不可爲道而遠人

凡作游戲之文必當寓忠厚勸懲之意此文要旨在起處與結處數語有國家者殷鑑在茲茹經自記

香港孔道學院演講錄 戊寅

朱聘三院長先生諸位教員先生雷蔭霖先生雷賓南先生諸同學鄙人並無學問承雷先生介紹邀請演

講實屬慚愧且因限於時間加以方言隔閡須請雷賓南先生覆述祇能略講我國學術綱要及求學門徑望諸君鑒諒

諸君須知人生世上應負最大之責任不過彌補天地之缺憾故中庸經曰參贊天地之化育自精神上言之人倫道德是也自物質上言之一切科學是也今欲興盛我中國必須求精神上之建設推廣到文化上之建設茲特分四大綱而言

一經學 前英國大使朱爾典告我國嚴幼陵先生謂中國決不至於亡讀實書足矣嚴詢以何謂實書曰中國之十三經而已夫外國人皆尊重我中國經典而近時我中國人不讀中國經書未免謬誤試問古今中外有自滅其本國之文化而其國能久存者乎固決知其必無有也十三經博大精深約言之當先讀孝經論語孟子大學中庸論孟學庸宋代理學四書人未有不孝弟而可以爲人者亦未有不孝不弟而可以辦事業治百姓者故孝經爲人生必讀之書論語要義在學仁政三字有淺有深當分析研究修己治人之道畢具於是孟子言政治學最精至痛切尤要者曰性善非謂閉門靜修也盡力於忠信孝弟禮義廉恥善己之性乃可以善國性故告滕文公曰可以爲善國大學作於曾子中庸傳自子思大學注重在格物當通達人情物理

世變道爲體而藝爲用內修歸於誠意中庸亦以至誠無息爲本蓋誠僞之界卽人心生死之別誠者人心之生理詐僞欺罔則其心死矣五經曰周易曰尙書曰詩經曰禮記曰春秋三傳以上諸經鄙人於詩經禮記左傳皆有分類讀本治左傳較易以軍事外交兩類爲要

二性理學 孔子言窮理盡性孟子言心之所同然者理也西人謂之哲學又謂之心理學皆不若孔孟言

性理可爲政治之根本宋代周子傳其學中間經二程子傳諸朱子至明代王陽明先生又特闢知行合一與致良知之學說清初有太倉陸桴亭先生平湖陸稼書先生儀封張孝先先生迨咸豐年間羅忠節公羅山曾文正公滌生左文襄公季高皆爲理學正宗蓋理學興盛則人正而國運昌隆也儀封張先生有正誼堂叢書餘姚黃梨洲先生有宋元學案明儒學案極爲詳備鄙人輯有性理教世書讀之亦可得門徑

三文學 凡考察國政者曰國情曰國力而要則在文化鄙人嘗有譬喻我中國經史子集各種學問猶箱中之寶也而文學則其鑰匙也倘文理不通卽無以開其鑰而得其祕讀史以四史史記前漢後漢書三國志南北史新

五代史爲要通鑑重在資治凡軍事外交地理均宜分類札記子部以老莊荀揚管墨爲必讀之書孫子十三篇如虛實行軍九地用間諸篇必深切熟玩而參以近今外國戰術此外諸子祇須涉獵集部昭明文選古藻瑰琦而欲求實用當讀唐宋八大家文其餘專集各就性之所近清代桐城姚姬傳先生選有古文辭類纂以爲文者天地之菁英陰陽剛柔之發其論最精審曾文正公選有經史百家雜鈔程度較高坊間有古文翼古文觀止頗便初學鄙人編輯有國文大義古人論文大義國文經緯貫通大義並宜熟讀

四品行 凡人讀書所以學爲人也若讀書而不修品行雖讀萬卷書何益周易師卦曰開國承家小人勿用泰否兩卦爲治亂樞機泰卦言治曰君子道長否卦言亂曰小人道長自古未有不明君子小人之辨而可以講學問者更未有不明君子小人之辨而可以行政治者何以謂之君子仁義忠信樂善不倦如虞舜之取人爲善以上孟子每日作爲課程躬行實踐乃可以立人極而崇人道此品行之修於外者也商伊尹之訓曰天之生斯民也使先知覺後知使先覺覺後覺知覺爲人生靈性所發倘遲鈍隔膜事事落於人後豈

能自強故今日要在訓練國民知覺然欲國民知覺之靈警而不能使之善良則將流爲欺罔變詐故孟子又嘗曰人之所不慮而知者其良知也惟其善良斯能靈警而其究必歸於深沉鄙人常謂智勇二字爲國民要素生聚教訓臥薪嘗膽何等艱晦孟子贊之曰畏天者保其國此品行之修於內也邇來人道教育廢棄盡矣鄙人不揣固陋常以正人心救民命勉爲家訓校訓深望吾國青年從事修養動心以致其靈警忍性以致其深沉上之爲聖賢次之可爲英雄

英文正云知人所不知謂之英雄人所不能謂之雄振興中國企予望之

辭賀重宴鹿鳴文壬午

文治蔡先人餘蔭忝竊科第光緒八年壬午隨先大夫赴金陵省試卽幸獲售時年十八忽忽六十年屆重宴鹿鳴之期諸執友相與稱賀僉謂吾鄉惟王藻儒相國會邀此典禮後無聞焉爰舉以相況且集賢爲懸匾於明倫堂以表紀念嗟乎相國晚年雖失意然值康熙全盛之時間閭康樂百姓雍熙行此禮宜也今科舉廢棄久矣鴻嗷中野魚潛深淵極目數千里道殣相望於斯時而稱賀私心彌抱不安矣無以有一言爲知己告先大夫常訓文治曰凡一身一家無歷二三十年而不變者然變而衰落者居多惟有積善可以永久文治謹寶斯言兢兢惕厲茲者世變多故正爲善不可失之時機詩曰維桑與梓必恭敬止吾邑太倉素稱瘠苦之區自丁丑以來飛鳥以凶民居如燬父母凍餓兄弟妻子離散城區可見者如此推諸各鄉其苦更不知如何一邑如此推諸全省全國其苦更不知如何言念及此不禁悄然以悲潛焉以泣曷若移稱慶之舉爲任恤之方乎幸哉邑中有善士錢誦三諸君設立粥廠自庚辰冬迄辛巳壬午中無間斷其始回鄉飢民就食約五百人至今歲夏增至七百三十餘人文治忝與勸募之列惟勸募有時而細備時局不定則

今歲冬振之能辦與否尙在不可知之數區區此心日夜焦灼惟願我積善會諸同人相與匡扶一面分途募款集腋成裘一面選擇飢民中力能工作者爲籌生計庶幾治本治標兩得其道功德之隆不較優於典禮乎昔韓文公送楊少尹序云楊侯始冠舉於其鄉歌鹿鳴而來也今之歸指其樹曰某樹吾先人之所種也某水某邱吾童子時所釣遊也鄉人莫不加敬誠子孫以楊侯不去其鄉爲法旨哉斯言文治去鄉且數十年矣回首故鄉滄桑幾易追維先人之訓兼懷諸知交愛我之誠縈繞於衷烏能自己用敢述先大夫善與人同之旨爲知己告夫吾鄉自陸陳江盛諸先生講明正學提倡宗風本爲積善之地今得諸君子充周善氣又得賢長官調護多方積茲善果擴而充之詎有涯涘在易保合太和至於各正性命在書平章百姓至於協和萬邦本一鄉之善廣之爲天下之善則吾太倉豈非善因所自昉哉企予望之矣

孫君煜峯五子字說甲申

及門江陰孫君煜峯屬代名其世系次序並屬爲其子五人名字說以寓訓誥之義余旣以壽恆齊萬保世滋大八字名其世系次序並爲其五子名字說曰古者二十而冠旣冠而字之成人之道也厥道維何在於正容體齊顏色順辭令旣字之後徧告於鄉大夫鄉先生及宗族朋友其尊重也如此煜峯長子先已名曰恆惕字曰伯弘次子名曰恆恂字曰仲毅三子名曰恆愷四子名曰恆忻五子名曰恆悌均未有序余按易恆卦彖傳曰觀其所恆而萬物之情可見恆之爲義大矣哉其大象傳曰君子以立不易方言操守必堅定也儼虛而爲盈約而爲泰則學問品行在有無之間難乎有恆可不懼哉惕者迺周易朝乾夕惕之義省諸心者也恂者論語鄉黨篇恂恂如發諸矚者也禮記愷以強教之悌以悅安之兄弟怡怡而一家之忻合無

問可知矣三子宜字曰叔裕四子宜字曰季樂五子宜字曰定綱爰進諸子而教之曰諸子之名與字或取諸易或取諸詩或取諸禮與論語內外交修表裏如一也伯弘當以弘道爲宗旨論語人能弘道非道弘人而寬弘大量寓乎其中仲毅與伯弘壘篴協和曾子言士不可以不弘毅任重而道遠仁以爲己任而天下之善事當以一身任之叔裕季樂亦當因字思義裕者綽乎有裕之義中庸寬裕溫柔惟能寬處境乃有餘地孟子言三樂首在父母兄弟之間倫常日用無所愧怍斯爲真樂夫世道原於秩序而秩序莖於紀綱大學三綱領以止於至善爲極則知止而後有定綱目定而萬事理此定綱所繇取字也詩大雅卷阿篇曰有孝有德以引以翼愷悌君子四方爲則所以諄諄於愷悌者其大本實在於孝德天下未有能孝弟而一家不與盛者亦未有能孝弟而一鄉不感化者深望諸子取孝經熟讀之參考余所著孝經救世篇及曲禮內則中論孝諸節目熟讀之視於無形聽於無聲躬行實踐毋須臾或忘庶幾子孫繩繩靡有不承君子萬年永錫祚胤後福庸有涯浹乎諸子當遵守勿替矣

香草居題詞甲中

無錫同鄉蔣君東孚素性愛蘭以香草名其居介錢君孫庵來書徵文余維聖人繫周易同人之象曰同心之言其臭如蘭世所傳猗蘭操謂孔子自衛反魯過空谷見蕸蘭喟然援琴而歌之以爲蘭乃王者香何爲與衆草伍豈非賢者不逢時蒙世之溫轍者與迨屈子作離騷經抒寫其忠愛之忱曰余既滋蘭之九畹兮又樹蕙之百畝其九畹則曰秋蘭兮青青綠葉兮紫莖又曰春蘭兮秋菊長無絕兮終古往昔聖賢何以皆愛蘭若是與蓋蘭者普氣之所凝結而薰蒸也大戴禮記載曾子之言曰與善人居如入芝蘭之室久而不

聞其芳何者以其與之俱化也吾錫至善之鄉也惠錫二山香蘭不少東林氣節至今未衰皆善氣之所留貽綿延而弗替也亞聖曰一鄉之善士斯友一鄉之善士一國之善士斯友一國之善士今蔣君篤好國香栽培嘉種至數百本郁郁芬芳且屬蕭君芷泉張君石園諸君健秋諸名畫師繪諸丹青貽諸同志殆欲以一鄉之善氣推之於一國與殆欲綿東林之善氣而步武前賢與殆欲師宗聖與之俱化之意而以友輔仁與抑將溯先聖之琴操而寄遐心於空谷與方今世俗混莽塵垢之氣多清潔之氣少莊周有言逃空虛者聞人足音蹙然而喜今余方避地潯濱聞香草居之名豈非難得之足音與蒹葭秋水露結爲霜久矣讀易履霜堅冰之訓能無惕然然余方將訪白駒之嘉客賦黃鳥之言旋消正月之繁霜而洗銀河之兵氛質諸蔣君與錢君其亦畢然高望而興盍歸乎來之願與

任琪女士懸壺紀念訓辭乙酉

任琪女士在本校肄業時天性溫淑植品端謹爲余所企賞同學所推許民國三十一年畢業後研究醫學昕夕勤劬茲將出而問世藉資實驗余維居今之世以行善爲第一要旨孟子以萑萑爲善爲舜之徒而行醫實行善之大端博施濟衆誠非易事而立人達人廣種福田決不可失也中庸云天地之大也人猶有所憾宋張子云爲天地立心爲生民立命何以弭人間之憾爲立心立命之根茲須於醫道驗之論語云見善如不及務望女士勉旃

孝純孫女大學畢業訓辭乙酉

我家自五世祖南軒公六世祖墨池公俱爲塾師載劉河紀略傳至九世先考若欽公益注重教育嘗有訓

曰凡爲人師者積善在此造孽亦在此熟讀詩書注重孝弟積善者也怠棄放任誤人子弟造孽者也孝純孫女大學畢業將爲人師矣爰書此勗之

胡君春臺收藏先哲書畫題辭乙酉

春臺仁弟以所藏扇面三十柄書畫若干幅見畀皆名人手蹟也其中如曾文正公彭剛直公及先師左文襄公遺墨尤可寶貴此外有文治未及知其名者未始不自慙舛陋也春臺自述得之於劫火之餘人莫知珍藏春臺見之大喜爲裝潢成帙寶而度之昔賢精氣不磨其殆有鬼神呵護之靈歟嗟乎古人所傳三不朽曰立德立功立言夫立功當乘時會而立德立言則在我可以修養切磋而成如此冊所蒐羅皆不朽之君子也道德功業著作所垂昭昭在人耳目而如文治者閱歷世變六十年餘三者無一成就上無以報邦國下無以對師門展玩此卷不勝滄桑之感並面熟渥緒也謹題數言用志景仰春臺在二十餘年前助余建造南洋大學圖書館誦練多才體用兼備今復好收藏若此其近世之難能而可貴者歟

茹經堂文集五編目錄

卷三 經說類

學易入門錄 甲申

讀書經大綱 己卯

古本大學微言 癸未

茹經堂文集五編卷三

太倉唐文治蔚芝著

經說類

學易入門錄甲中

易有旁通卦乾卦文言傳所謂六爻發揮旁通情也如乾坤坎離頤大過等是也有反對卦如屯蒙需訟等是也分宮中有世卦一世變一爻至五世後爲本卦孟子所謂君子小人之澤五世而斬也有十二辟卦辟者主也復臨泰大壯夬姤遯否觀剝乾坤是也分宮中又有游魂歸魂卦如乾宮火地晉火天大有是也有互卦如泰卦去初上爻中互歸妹卦故泰五爻言帝乙歸妹其明證也又有上下相易卦如天澤爲履澤天爲夬而履卦五爻言夬履貞厲其明證也

學易之法應先研究八卦意義熟讀乾坤兩卦本義中分宮取象歌及上下經卦名卦變歌均應熟讀

學易宜先明易例當先讀余所撰讀易提綱（易微言較深緩讀）次讀消息大義中學易反身錄次讀消息諸卦則其餘義例自可逐漸領悟矣

學易當先知漢宋家法漢易以唐李鼎祚周易集解爲主內所載鄭荀虞三家說最要通志堂經解中以項平父先生周易玩辭吳草廬先生易纂言爲最玩辭通達義例纂言洞明源流也學海堂經解內各易學書惠氏定宇張氏皋文所著尤精宋易以程伊川先生易傳爲主而輔以朱子本義近儒任氏啓運周易洗心

姚氏配中周易學陳氏世鎔周易廓曹氏復禮堂集亦可得入門之法

宜聖有言五十學易可以無大過而繫辭傳則言聖人以此齋戒以神明其德六十四卦大象傳以字均反身內勘可見學易必當措諸躬行齋心寡過若徒事空談道聽塗說於身心毫無實益也

顧亭林先生謂讀易書二百餘種無有過於程傳者按繫辭傳言易有聖人之道四焉以言者尙其辭以動者尙其變以制器者尙其象以下筮者尙其占程氏傳尙辭者也而變與占均括其中朱子本義尙占者也齋易傳朱子本義盛行於世誠齋以史事說易遠紹千寶家法近此書不易得初學先讀程傳及本義足矣以陰陽之義言之陽爲君子陰爲小人然乾卦僅三畫坤卦則分六畫此世界中所以君子少而小人多上達下達學者不可不慎也然泰卦君子道長小人道消則小人皆化爲君子矣曷謂君子之道論語所謂懷德喻義是也曷謂小人之道論語所謂懷惠利喻利是也孟子曰舜與蹠之分利與善之間故學易首以端心術爲本心術端而品行無不正矣

韓昌黎云易奇而法如伏羲畫八卦因而重之而文王繫之辭曰乾元亨利貞坤元亨等云云周公作爻辭言潛龍勿用履霜堅冰等云云可謂奇矣然其中變動不拘或言天道或言人事或言修己之方或言治人之道卦爻錯綜又各自有其法惟在以身體之而已

坤卦文言傳云積善之家必有余慶積不善之家必有余殃繫辭傳云善不積不足以成名惡不積不足以滅身蓋元者善之長也元氣保於一心而後能流行於社會善氣保於一家而後能推行於邦國易者積善

之書也故學易者決以遷善改過勉人行善爲惟一宗旨況在今日欲救心救身救家救國救世道在爲善而已

讀書經大綱己卯

秦火而後尙書罹厄最甚故讀尙書者宜先辨真僞真者漢伏生所傳今文尙書是也僞者東晉梅賾所傳古文尙書是也伏氏所傳共二十八篇梅氏所傳共五十八篇僞者如大禹謨等二十五篇梅氏并撰僞孔安國傳唐時列於學官學者莫辨共是非至宋朱子始疑其僞清代諸儒始釐別之讀者求之於字句神氣之間自可識其真僞矣

揚子法言云虞夏書渾渾爾商書噩噩爾周書灝灝爾韓退之云上規姚姒渾渾無涯周誥殷盤詰屈聳牙實本揚子之說學者讀書審察其文章之盛求其所謂渾渾噩噩灝灝者庶幾深造自得矣至梅氏書文法頗謹嚴其論政事亦有可採之處周書以周公召公所作最爲精要考史記所載先儒所述如牧誓金縢大誥多士無逸立政康誥梓材洛誥諸篇忠厚愷惻至誠感人靖一時之變亂垂八百年之丕基胥在於此至哉文乎至召公所作雖僅召誥一篇而敬畏天命兢兢保國罔敢失墜其言節性日邁當與詩卷阿篇俾爾彌爾性參讀爲後世性理學之祖余別有說

參考各書如清代閻百詩古文尙書疏證江良庭尙書集注音疏王西莊尙書後案孫淵如尙書今古文注疏而後案辨析今古文尤簡而醒目近代吳摯甫尙書故引史記文與本經互相參考更爲精當蓋司馬遷嘗從安國問故與伏生所傳今文家說殊途同歸也

古本大學微言癸未

將欲究天人之奧探性命之原窮經史之繁蹟豈易事哉或失之鑿空或失之傳會或失之臆造此無裨於聖經而徒滋枝葉者也大學一書傳授源流於諸經中較爲繁雜有禮記注疏本有大程子二程子本有朱子章句本有王陽明先生興復古本有高景逸先生本有劉蕺山先生本綜而論之注疏本係小戴相傳之舊當爲聖門所流傳無所謂古本今本也朱子章句強分經傳後人多訾議之不知朱子之意不過紹二程之旨爲私家著述藏以待正厥後科舉皆奉爲金科玉律則朱子所不及料也陽明先生興復古本雖矣至高劉二家疑知止而后有定兩節爲格物知至傳文不知知止節承上文止於至善言物有本末物卽格物之物無可疑者陽明先生高弟王心齋先生民首倡此義當時謂之外內格物明儒學案中詳載之允矣余常謂八條目以脩身爲本脩身以誠意爲本故誠意章直提誠意不必言欲正心先誠其意也而誠意之要以好惡爲綱維自如惡惡臭如好好色起正心章有所好樂忿懣則不得其正脩身章好而知其惡惡而知其美者天下鮮矣治國章其所令反其所好而民不從平天下章惟仁人能愛人能惡人好人之所惡惡人之所好是謂拂人之性始終以好惡爲綫索而末用以義爲利不以利爲利作結實隱用周易利物和義之旨而明揭之曰仁者以財發身不仁者以身發財後人喜言發財自陷於不仁而沾沾猶以爲得計哀哉此大學一書所以爲今日救國之良藥也前數十年州庠里塾學生莫不讀大學講師循文講解無有能會通其旨者近則視爲迂言廢而不讀嗚呼大學爲聖功王道合一之書豈迂而無用哉余特發其微以曉來者如欲沿流溯源研究全體大用則有朱子章句與余所著大學大義及陽明學術發微中四大問題在

茹經堂五編目錄

卷四 贈序壽序類

贈繆生天行序 癸未

郭晉之先生九十壽序 壬午

周君止庵八十壽序 甲申

閔君之孝八十壽序 庚辰

榮君德生七十壽序 癸未

張君竹溪七十壽序 癸未

林君菽莊七十壽序 甲申

許君潤生七十壽序 甲申

金君宗城五十壽序 甲申

伯元宗兄五十壽序 癸未

紀雲宗弟六十壽序 甲申

胡母顧太夫人八十壽序 壬午

弟婦蔡太夫人七十壽序 乙酉

袁母楊太夫人七十壽序乙酉

茹經堂文集五編卷四

贈序壽序類

太倉唐文治蔚芝著

贈繆生天行序癸未

性情者修身立品之大原也人而無真性情則宇宙爲虛器人生爲虛事乾坤或幾乎息人類亦幾乎滅矣故善相士者最重性情而行詣學問次之余於己卯歲講學滬上孫生煜峯繆生天行等五六人合組聽講闔來余南陽寓廬受學孜孜屹屹鏗而不舍詩曰風雨如晦雞鳴不已其志其行洵足嘉許也癸未秋繆生將有遠行余特授古人贈言之例以勗之曰人之品視其性情而其德莫大於孝生以孝行著於家侍慈闈能善承顏色母夫人年高多病易怒而生巧變曲體罔有違忤每值一語排解母夫人輒爲霽顏夫人之行莫大於孝觀易象六十四卦相生而孝心油然而發書堯典首言克諧以孝詩既醉篇言孝子錫類禮記曲禮內則二篇詳言事親之道冬溫夏清昏定晨省祇敬杖履出入扶持問寒問煖視膳奉甘生可謂能知其意能踐其實者矣追溯文治中年值先母胡太夫人患肝疾抑鬱善怒文治每戚戚然若靡所底止如是者十餘年至今思之潸然生須知比時之行不正履食不甘味久之而吾親告痊實爲人生最幸事也又聞余去年患膀胱炎證生頗聞其險曰吾師得毋因講學劬勞而至是乎因泫然出涕嗟乎師弟之間感情懇至若此實近世之難能而罕觀者矣生故習經濟學會赴閩省主持省銀行於時金融紊亂萬目睽睽生於盤

根錯節之餘爬梳積垢因應咸宜以是見重於當道人咸服其才之諳練不知皆其真性情有以固結而感化之也大學言修齊而後及於治平孟子言老吾老及人之老生今歲適當強仕之年膂力方剛有志四方度其抱負必有遠過尋常者惟知己者有以默喻之也生行矣其本此真性情擴而充之以行於社會以達於國家俾人人觀感壹家務爲孝行太和之氣洋溢寰區豈非吾道中之光榮乎生其勉之哉

郭晉之先生九十壽序壬午

余曩時讀桃花源記爲神往不置嘗歎淵明文章虛設之境抑何空明幽雅若是雖然君子之道以心不以境以神不以形所蘊蓄者在方寸之間耳古詩云小隱隱陵阿大隱隱朝市夫陵阿而懷朝市之心雖雅亦俗朝市而有陵阿之志雖俗亦雅也莊子曰樂全之謂得志曷嘗肥遯以鳴高哉壬午三月上巳蘭亭修禊之辰忻值晉之先生九秩懸弧之慶春融景明惠風和扇其文孫豫森君輩將謀稱觴以祝嘏先生以世變方殷堅不許於是豫森君浼朱君大可紹介來請爲壽言以光家乘余迺肅然起敬曰先生冲襟雅抱其有類於淵明歟按先生爲嶺東望族天性孝友有昆季四人洎屢經患難先生如魯靈光殿巋然特存蚤歲懋遷海上信義交孚遇事直言無隱衆皆推爲長者曰艾而後慨世俗甚驚塵上歎曰時會波靡古道日湮矣爰遯歸潮陽銅鉢孟鄉栽花種竹課雨話晴飄飄然有出世之概見者嘆羨非所謂懷陵阿之志者歟桃源繚遠溯洄伊人于焉逍遙矣無何世變元黃戈鋌滿地不得已再遷滬上則復由陵阿而城市矣而家庭和樂秩秩雖離四代同堂含飴繞膝黃髮垂髫並怡然自得方寸間依然桃源境也奚必陵阿哉顧先生所以致此福者則大有在蓋人之行莫大於積善而萬善之原首基於孝先生年登九秩可謂上壽矣夢帝九齡

徵諸古禮汾陽壽考家世豔稱而天保九如之頌岡陵山阜尤重者松柏之茂毋不爾承回憶先生哲嗣振鳴君善承親志當先生七秩晉五之年建造宗祠輪焉奐焉以妥以侑洵乎孝思之不匱也德配胡夫人繼配陳夫人均勤儉持家賢而有德綜計先生一本所推多至二十餘人文孫豫森君輩均恂恂有禮克昌厥宗而豫森君以學士經商在棉業界令聞卓著主持鴻章紡織染廠暨通成公司兼辦大新化學廠成績斐然舉可觀焉曾孫大棟年方弱冠專攻紡織好學篤行頭角崢嶸惟望善體先生之志續戎繩武樂善不倦則先生期頤之壽可操券而致矣謹挈百朋之酒用晉百歲之觴焉

周君止庵八十壽序甲申

粵維閏逢涓灘之歲余月吉日忻逢秋浦止庵周先生暨德配劉夫人八旬雙壽良辰鄉鄰僚友僉謀具耐酒以甘之鏗笙簧以樂之先生曰止方今鴻噉于野魚潛于淵振濟方殷違言壽乎爰有廣勸廣利廣豐公同諸同人以先生爲棉業領袖來請爲文用彰懋德余與先生有相識之雅而與先生昆季爲壬辰春闈同年誼不獲辭爰揚權而陳之曰人生至樂無逾於家庭倫紀之間先生之尊人懋愼公敝歷仕途總制兩江勤政愛民風清弊絕至今葭屋茹檐口碑弗替先生往來隨宦潔養蘭陔業業陸陸實趨實視洵能紹述丕基揆揚世澤兼能擴而大之此其喬梓宏猷足爲鄉邦矜式者也先生隨宦津海關時親迎劉夫人於道署造舟爲梁丕顯其光祥女升堂六嫺交賀鳴雞弋鴈將翔將翔迄今已屆花甲一周先生八十攬揆劉夫人齊眉燕喜此蓋西俗所謂金婚尤難得而可貴者先生自賦詩云不圖今白髮猶是昔紅妝窈窕窈窕星雲煥彩矧劉夫人敦詩達禮內則夙嫻子婦榮區曾元梨棗芝蘭玉樹繞膝承歡此其閨門起化克享人間至

福者也先生慮狂瀾既倒不易挽回又勸設宏毅學舍造就多士菁莪棧模追琢其章竹箭南金胥歸繩墨
榘楠悉入網羅庶幾清流模範不使浸入頹波此又儲才致用出於大匠之門者也而余所以頌揚先生者
則更有在周易言進德修業推之爲崇德廣業極之爲盛德大業夫吾儒明體達用蘊之爲德行發之爲事
業而已蠱卦之上爻曰不事王侯高尚其事象傳謂其志可則遯卦之五爻曰嘉遯貞吉象傳謂之正志上
爻曰肥遯無不利象傳謂之无所疑先生初官工部郎中改官直隸道員厥後洊升財政部長當是時枋政
者倚畀方隆適帝制議起朝政紛靡先生毅然退隱不以身之察察受物之汶汶矐然不滓非所謂高尚其
事嘉遯正志肥遯而無所疑者歟由是退藏斂德專心壹志於實業蓋先生之心以爲方今競爭時代端賴
富強而富強之源必以實業爲根本寰球富國之策以棉鐵爲大宗故先生服官時卽注意於通商興工開
灤煤礦爲東亞首屈之區先生倡議合併以厚集資源於是又有北京自來水公司唐山啓新洋灰公司天
津鐵工廠之設又勸辦官銀號爲北洋金融重心而北方水利失修農民守舊種棉者絕少先生於是廣興
棉業爲京津一帶倡初錫邑楊藝芳藕芳諸先進先樹棉業基礎味雲翰西昆仲繼之先生與之協力同心
在錫邑勸設華新紗廠推及唐山衛輝青島等區利溥惠周各省聞風興起而後華北棉紗事業乃與南中
並驅爭先矣凡此諸端雲蒸霞蔚鶴峙龍蹕先生以商救國裕國卽以興國其苦心孤詣固人所共見者也
方其入仕之初早懷興業之願然而考槃碩人棲遲衡泌白駒嘉客於焉逍遙不爲鳳翥而爲鴻潛閉門卻
掃罕與世通識者歎羨以爲神仙中人而民生之利弊商業之恢張未嘗不往來於胸中禮記儒行篇曰竟
申其志猶將不忘百姓之病先生可謂憂思特立者矣南山有臺之詩曰樂只君子邦家之光閭官之詩曰

魯侯燕喜令妻壽母爰躋堂稱祝用申天保九如之頌預祝期頤百歲之徵焉

閔君之孝八十壽序庚辰

粵維歲躋庚辰建子之月十有四日忻逢之孝先生暨德配蔣夫人八秩設醴良辰哲嗣魯西剛侯兩君謀
諸鄉鄰戚友將具酎酒以甘之和絲竹以樂之於時春釀初熟祥風斯扇迺有執爵而晉頌者曰繫維之孝
先生幼而聰穎長而徇齊讀書一目數行下而茹苦食貧不克具脩脯迺歎曰人生當世事親爲先陔蘭潔
養吾誦之矣爰舍儒業入市廛習貨殖懋遷有無夙夜黽勉以供菽水人咸謂閔氏有子矣蔣夫人系出名
門爲當塗詩人廩膳生松濤公之遺腹女幼與之孝先生同塾讀書畢五經業明雅通達年二十一來賴祥
女升堂六嫔交賀槃匱滌穢柔色以溫惟時之孝先生操業未閔夫人佐以女紅一門之內其樂融融夫修
齊之道在庸言庸行此豈不足爲世俗法乎於是又有執爵而晉頌者曰古者教子之道首重義方家世之
丕顯本支之懋隆胥賴子孫之繼繼繩繩不係乎弋取功名而在乎敦行孝悌此一家盛衰所由肇也之孝
先生綴督魯西剛侯綦嚴誦詩讀書有不洽熟者則以夏楚收其威夫人以慈愛爲宗旨聿顧聿復恩斯勤
斯裕班伏之高才植薛荀之令譽課讀篝燈寒暑罔輟恆誦小宛之詩夙興夜寐無忝所生諄諄告誡魯西
昆季用能秉椿萱之訓循禮義之規汎愛親仁恣懷弗懈古所稱韋趙兄弟人之杞梓何多讓焉此豈不足
爲邦家光乎於是又有執爵而晉頌者曰易稱積善之家必餘慶書言吉人爲善惟日不足孟子亦言孳
孳爲善者舜之徒善氣之鬱蒸君子之澤也被其澤者漬以深飲其氣者默而化矣之孝先生富而好禮仁
以存心加以利物和義貞固幹事每值暴豪之強梗必有以鋤之胥吏之欺罔必有以懲之於是鄉里善良

熙熙皞皞如登春臺夫人敦葛藟之本根慕麥舟之高誼弟婦張氏青年守志松柏清操夫人慰問慰藉時加任恤至於里閭稱貸虛糜不辭婢媼言貧獨金賜惠雖至囊空如洗彌覺怡如晏如此豈不足揚望家之靈史備里乘之書祥乎余於是錮鈞致敬執爵而晉頌曰是數說者臆矣然吾聞徐幹中論之論壽曰有王澤之壽有聲聞之壽有行之壽今之孝先生與夫人之德蓋由行仁而得令聞者也五德以仁爲權輿而體仁以孝爲萌牴中庸言因材而篤大德必得其壽孝經言孝爲德本教所由生孝弟之至通於神明光於四海之孝先生承馬父之洪胄嗣子壽之德音平居衣不章美食不飫甘壹以養親爲職志並贊助乃弟結綢盛禮以安親心兄弟既翕和樂且耽父母其順矣乎記曰視於無形聽於無聲之孝先生有焉於是鄉鄰稱頌然曰幸哉有子如此蓋不間於父母昆弟之言克紹其遠祖矣夫人式刑于化綢內則文祇敬几履博堂上歡比年避地滬濱而歲時祭祀必返梓鄉蘋蘩躬采籩豆靜嘉洞洞乎敬愉愉乎忠詩天保篇頌南山之壽基於吉蠲孝享又曰如松柏之茂無不爾或承言子孫之善於承先也大雅既醉之六章曰孝子不匱永錫爾類其八章曰釐爾女士從以孫子鄭箋謂女而有士行者必生賢智子孫以隨之夫人有焉是以賢嗣繼起魯西爲文學士工詩文善音律揚扈風雅敦厚溫良剛侯爲法學士精法律障人權無偏無陂有倫有脊當世目爲二難人羨其金友玉昆後先濟美而不知之孝先生與夫人之教有以啓迪而薰陶之也爰考之孝先生築室於蓮溪之南考槃在阿徜徉風月望見之者歎爲仙侶而邇時白頭伉儷舉案齊眉視履考祥康彊逢吉百歲期頤之慶更晉祝於無疆矣衆咸曰善哉爰序以紀之之孝先生與夫人聞之其皆適然進一觴乎

榮君德生七十壽序癸未

粵維閏逢潛灘之歲孟陬之月吉日忻逢德生榮先生暨淑配丁夫人七秩雙壽良辰蘇浙皖紗廠同業公會諸同人僉謀所以壽先生者來徵序於余竊維先生事業廣矣博矣然自有其本原在先生自幼天性純篤喜讀羣經尤以四書孝經爲萌牴年十五乃兄宗敬先生介至滬上通順錢莊習業貫通書算年十九隨厥考熙泰公至粵任三水河口釐局總副會計職弱冠返蘇親迎丁夫人來歸五稔以內風塵僕僕惟錢業稅務整飭經營年二十六慨然曰丈夫貴自立依人非長策也遂決意自創事業於是有保興麵粉廠之設年二十九改組易名曰茂新年三十一又有振新紗廠之設福新麵粉廠之設年四十一又創設申新一廠於滬年四十四又創設申新三廠於錫年五十一兼辦常州紗廠年五十六歸併三新紗廠爲申新九廠規模益闊遠凡茲商業人第見其霞蔚雲蒸龍驤鶴峙而不知先生之心在以商救國裕國卽以興國不言而躬行者在澄思默慮中也其他關係於教育者如創立公益學校開闢梅園籌設大公圖書館復設豁然洞讀書處教思廣被關係於公益者有若建築梓鄉公路設百橋公司建寶界橋爲蘇省鉅觀又余掌南洋大學時先生捐鉅貲助成圖書館余爲鑄熙泰先生銅像永垂不朽而先生孝思永傳矣抑余更有進者先生自幼學賈於太倉篤嗜陸桴亭先生之學迨中年後披覽陸子遺書旦夕不釋然則先生之學在尙志居敬以立其本窮理盡性以攬其全天人貫徹體用兼賅尤爲人所難能余所欽仰先生者實在於此丁夫人慈祥愷悌勉儉勤哲嗣金友玉昆肩隨濟美後福正未有艾用特序而敷陳之爲工商家勸爲公益家勸爲教育家勸而卽爲道德家樹之樞型爰郵致蘇浙皖紗廠同業公會以爲躋堂慶祝之侑焉

張君竹溪七十壽序癸未

周易言立人道曰仁與義仁者生生之理也其爲道豈不大哉植物之生也大者有畹其實小者亦施於宇故易言碩果又言復見天地之心識者曰造化生生之理所寓所謂仁也是以桃杏松柏其實皆稱仁仁道充溢蒸爲善氣成爲佳果子孫食之一家善氣彌綸磅礴豈不麻哉癸未秋季初二日忻逢張君竹溪七秩晉六雙壽良辰哲嗣鉅榮等謀所以爲壽者君曰止此何時違言壽耶於是其四子鉅榮慰慰來徵文曰文足以壽世較諸一時稱慶其裨益爲尤大余按其實爲之起敬曰若君者洵無愧仁人矣考君世系出南宋清河郡王明萬歷間王之裔孫自津沽始遷浦左遞傳若干世至彥博公業農樂善又傳至乃祖維熊公生六子厥考秋濤公行居三生二子長曰蓮溪次卽君也君幼時慷慨有大志受業於從兄棣華先生之門弱冠棄儒就賈初營業於滬江唐恆泰果肆忠信篤誠肆主深倚畀之擢升要職繼念碌碌依人終非長策爰與蓮溪君鳩資張肆於邑城曰恆和順貿梨販棗懋業日宏乃益恢擴於滬市列肆曰張恆茂曰祥茂曰同茂司馬遷有言長袖善舞多財善賈凡貨殖之方當就民生日用所需者爲之流通而曼義若君之揆張果非所謂佳果者耶於是同志欽佩而歆羨之者爭欲合資以牟利曰永大曰順茂曰協茂皆能別樹一幟而隸屬於君者也惟君退然不自滿更欲本業之發達而鞏固爰高掌遠蹠倡議斥貲購置民房首捐巨金同聲相應衆皆景從今日之時行堂大廈崔構崇宏爲同業公所會議平準咸萃於斯實皆君之力也然吾所心折於君者不徒在營業之擴充而在爲善之勇決蓋善氣之在天下細細蘊蘊有感必應川沙僻處鄉隅民貧地瘠清光緒之季邑人士始創立至元善堂規模未備民國三年君參預堂務自錫巨金維持常費